



國朝書畫錄

3530
4-2



手 3
3530
4-2

國朝書畫家筆錄卷二

曹秀先

楊廷果

謝淞洲

趙丕承

陳士璠

梁文泓

徐貞木

汪士鏗

沈閱

徐揚

余省

魏成

屠璇

吳博屋

嚴鈺

張翀

朱孝純

劉綸

楊汝諧

周升桓

孔繼涑

竇光鼐

楊潮觀

顧諶

盛綱

盛惇崇

盛惇大

劉墉

翁方綱

梁詩正

梁同書

王文治

王玖

華岳

鄭燮

金農

王一峯

莊有恭

葉超

姚仔

秦銑

周復

錢維城

龔賢

曹元俊

| | | | | |
|-----|-----|-----|-----|-----|
| 錢載 | 史廣南 | 張鼎錫 | 王嘯 | 魏之璜 |
| 秦彬 | 王宏撰 | 李英 | 李萼 | 魏之克 |
| 沈瑤池 | 趙左 | 吳宏 | 程邃 | 繆頌 |
| 戴炳 | 周尙文 | 汪葑 | 趙秉冲 | 史震林 |
| 顧鶴慶 | 李榆 | 戴禮 | 陳率祖 | 項悰 |
| 戴遠 | 王惟馨 | 周於禮 | 徐良 | 秦瀛 |
| 朱方壽 | 李敬思 | 邢泰 | 陳嵩 | 秦大士 |
| 陶之金 | 黃掌綸 | 華冠 | 王玉海 | 梁國治 |
| 勞澂 | 樊圻 | 葉榮 | 貢震 | 季麟 |
| 馬豫 | 施心傳 | 白雲上 | 黃經 | 顧光旭 |

| | | | | |
|-----|-----|-----|-----|-----|
| 錢杜 | 汪之瑞 | 王日杏 | 任翔 | 張制 |
| 王申來 | 笄飛石 | 徐誌義 | 吳作樟 | 鄒典 |
| 鄒喆 | 顧彬 | 儲家亨 | 張宗蒼 | 張洽 |
| 鄧石如 | 朱山 | 諸昇 | 高岑 | 高阜 |
| 沈樹玉 | 畢涵 | 孫永清 | 焦秉貞 | 錢維喬 |
| 陳舒 | 高翔 | 冷枚 | 戴大有 | 王灝 |
| 張棟 | 張肩 | 沈祀懋 | 顧卓 | 陳明善 |
| 劉錫嘏 | 邊壽民 | 童鉦 | 袁樹 | 秦儀 |
| 秦寶 | 高樹程 | 余集 | 潘弈雋 | 吳楸 |
| 吳霽 | 葉育年 | 吳賓 | 陳卓 | 王鳳儀 |

| | | | | |
|-----|-----|-----|-----|-----|
| 嵇承謙 | 嵇承豫 | 袁泓 | 袁宮桂 | 康濤 |
| 潘恭壽 | 周銓 | 周覽 | 馬欣 | 丁元公 |
| 董誥 | 李琪枝 | 侯光第 | 許友眉 | 王宸 |
| 羅聘 | 秦文錦 | 錢澧 | 汪本直 | 周在豐 |
| 顧尊德 | 陶守謙 | 盛丹 | 勵守謙 | 陸遵書 |
| 凌瑚 | 汪體仁 | 梁嘯 | 凌秉竹 | 程兆熊 |
| 汪穀 | 江介 | 謝希曾 | 陸恭 | 陸耀 |
| 張賜寧 | 毛上哀 | 彭良啟 | 殷樹柏 | 查禮 |
| 曾燠 | 范永祺 | 蔣維勤 | 陸飛 | 舒位 |
| 萬上遜 | 常世經 | 吳文徵 | 張寶 | 姚鍾德 |

| | | | | |
|-----|-----|-----|-----|-----|
| 陳靖 | 程元豸 | 金學蓮 | 陳靚 | 翁樹培 |
| 熊方受 | 王元勳 | 吳履 | 王宜 | 郭鼎京 |
| 汪樸 | 張敵 | 顧雋 | 沈友士 | 姜恭壽 |
| 吳豫杰 | 姚宋 | 汪文柏 | 李巒 | 莊培因 |
| 瞿潛 | 錢秉義 | 韓雲俊 | 俞兆晟 | 朱賓占 |
| 鈕貞 | 顧知 | 程鳴 | 李崧 | 張師范 |
| 楊焯 | 沈士充 | 楊晉 | 錢坫 | 羅牧 |
| 高星紫 | 吳求 | 吳期遠 | 曹岳 | 孔廣森 |
| 邵曾復 | 章逸 | 朱宗洵 | 張雍敬 | 王概 |
| 閔貞 | 沈顥 | 鄒方鏐 | 鄒容成 | 上官周 |

| | | | | |
|-----|-----|-----|-----|-----|
| 張道渥 | 許庭堅 | 孫均 | 張御乘 | 馮仙滉 |
| 松筠 | 孫銓 | 蔣和 | 張崟 | 尤蔭 |
| 袁舜裔 | 嚴怪 | 寶廷棟 | 寶宏楣 | 宋葆瀆 |
| 王霖 | 顧樹本 | 史嗣彪 | 孫寅 | 關槐 |
| 陳嘉言 | 郭鞏 | 陸灝 | 鐵保 | 王樾 |
| 戴本孝 | 蔣太元 | 呂苴 | 蔣煜 | 賈鉉 |
| 楊二溥 | 薛奕 | 白銘 | 唐宇昭 | 施霖 |
| 劉度 | 方士庶 | 葉潢 | 柳培 | 任元璋 |
| 姜廷幹 | 程鵠 | 王相英 | 薛宣 | 張宏 |
| 韓錫祚 | 岳瀾 | 曹掌 | 蔣宏銘 | 葉欣 |

| | | | | |
|-----|-----|-----|-----|-----|
| 佟世晉 | 馮敏昌 | 賈季超 | 徐承祖 | 楊點 |
| 王鳴韶 | 畢沅 | 姚鼐 | 吳錫麒 | 侯鳳苞 |
| 易祖栻 | 鮑楷 | 程琳 | 方薰 | 馬履泰 |
| 王學浩 | 孫星衍 | 秦鶴 | 吳乘 | 過鵬飛 |
| 奚岡 | 胡鋼 | 李點 | 華烜 | 何道生 |
| 高雅壘 | 王芑孫 | 陸立 | 張問陶 | 許憲 |
| 陸紹曾 | 桂馥 | 朱紱 | 畢溥 | 蔣祥墀 |
| 蔡嘉 | 宋光寶 | 郝掄達 | 洪亮吉 | 邵士變 |
| 唐英 | 蔣仁 | 姚之麟 | 張錦芳 | 俞琨 |
| 錢楷 | 李寅 | 蕭晨 | 翟大坤 | 畢瀧 |

| | | | | |
|-----|-----|-----|-----|-----|
| 朱鶴年 | 黃鉞 | 嵇承咸 | 吳錫桂 | 王鵬運 |
| 方遂源 | 汪恭 | 陳枳 | 朱雲燦 | 姜漁 |
| 黎簡 | 竇廷槐 | 朱繡 | 朱嶼 | 章敏 |
| 顧王霖 | 錢東 | 阮元 | 張彪 | 王國棟 |
| 王嘉樹 | 王寶檀 | 龔誠 | 邵辰煥 | 伊秉綬 |
| 汪繩煥 | 杜曙 | 洪範 | 杜文原 | 朱會東 |
| 馮源濟 | 嚴英 | 鍾澐 | 邢彥成 | 程功 |
| 紀復亨 | 吳巖 | 邢澍 | 萬承紀 | 侯士毅 |
| 沈銓 | 陳豫鐘 | 趙懷玉 | 石韞玉 | 馬士圖 |
| 王謬 | 馬振 | 朱文燦 | 朱昂之 | |

國朝書畫家筆錄卷二

無錫九峯淡士寶鎮輯

曹秀先 工書

曹秀先字冰持一字芝田號地山江西新建人有異稟讀書日數行下七歲學爲文日可構時藝十餘首十二歲患目疾失明贈公憂甚有道人詣門以手摩之曰可治約翼日持藥來已而竟不至目忽明乾隆元年成進士授編修官至禮部尙書以文學受主知沈默厚重謹守成憲戒更張恭遇國慶武成巡幸諸大典所進詩文册皆稱旨尤工書法謚文恪

楊廷果 工書

楊廷果字令貽無錫人少有逸志生平不應有司試善吹簫鼓琴又善琵琶工書喜購名人墨蹟自北宋蘇黃米蔡暨元明趙祝文董無不備著有閒意草所藏米帖及東坡墨竹客觀其貧指困欲易之不可得易簪之夜命取而納之懷中以殉焉

謝淞洲

謝淞洲號林村長洲人詩宗西崑畫學倪黃後兼宋人筆意疏爽有法則精鑒別古法書名繪雍正時特旨召入命其鑒別內府所藏之真贋因進所畫山水世宗嘉之

趙丕承陳士璠梁文泓徐貞木汪士鏗

趙丕承字職方號晚亭又號鶴臞道人吳縣人書法趙董穆然深

靜時有陳士璠梁文泓徐貞木汪士鏗俱以能書稱士璠字魯齋浙江錢塘人由附生舉鴻博廷試授庶吉士工書法文泓字深笠號秋潭亦錢塘人工書在吳興華亭之間貞木字士白號白榆浙江嘉興人工篆隸行草鐫刻詩詞著懷古堂集士鏗字筠川安徽休甯人由副貢生舉鴻博廷試授庶吉士工書法結構嚴密

沈閔徐揚余省

沈閔徐揚余省俱精畫學閔字元渚號遠渚華亭人工山水儼似耕煙手筆揚字雲亭吳縣人欽賜舉人官中書供奉內廷工山水花卉筆意工妍惜少士夫氣省字曾三號魯亭常熟人供奉內廷善畫花鳥工麗有餘神韻畧減

魏成屠璇吳博屋嚴鈺 工畫

魏成字西疇號耕雲無錫人黃鼎弟子畫取其神不襲其貌山水超逸動人時有屠璇吳博屋嚴鈺亦有畫名璇字彝珍號疎村又號浮玉山農長洲人邱廷溶弟子時稱出藍峯巒渾厚草木華滋博屋字補齋吳江人工花鳥憚格後稱嗣音妍秀頗足悅目鈺字式如號香府嘉定人官閩官工山水深厚明秀元人正宗

張翀朱孝純 工畫

張翀字東谷號晚翠老人青浦人張鵬翀弟子工山水筆意秀雅暮年似失豪放有朱孝純字子穎號海愚者漢軍正紅旗人乾隆壬午舉人官兩淮鹽運使畫仿倪迂用筆雅逸著海愚詩鈔

劉綸楊汝諧周升桓孔繼涑 工書

劉綸楊汝諧周升桓孔繼涑俱以能書著稱綸字春涵號繩庵武進人乾隆丙辰薦鴻博廷試第一授編修官大學士謚文定書法魯公兼承旨骨肉停勻繩著庵內外集汝諧字端揆號柳汀一號退谷華亭人官通判家富收藏書宗米董通音律精篆刻著崇雅堂叢書升桓字禪圭號山茨浙江嘉善人乾隆甲戌進士官廣西巡撫書法蘇米兼吳興繼涑字信夫號葭谷一號谷園又號雲廬子衍聖公傳鐸子山東曲阜人乾隆三十三年舉人官中書工書法筆意凝鍊得張照傳人稱其酷肖精鑑賞摹刻名人法帖摹古帖玉煙堂帖玉虹鑑真玉虹樓帖集張文敏公書爲孔氏百一帖

寶光鼐 工書

寶光鼐字元調號東臯山東諸城人幼有神童之目年十二讀文選卽操筆爲琅琊臺賦尋補弟子員乾隆七年進士授編修官至左都御史詩宗少陵古文法退之工擘窠書望而知爲端人正士卒年七十有六

楊潮觀 顧諝 工書

楊潮觀字宏度無錫人乾隆元年舉人官知州幼擅才華雅好著述性利易爲政廉敏有聲尤工書法同邑顧諝字稼梅喜作詩工書真行篆隸俱入格上下淮揚蘇松之間書題屏障多出其手吾錫自王蔣兩寓公後人人以爲推稼梅挾其藝以遊致名公鉅卿

歲時存問無虛日如是者五十餘年然而白首空囊老病卧一室卒後詩草不知落誰手可慨矣

盛綱 盛惇 崇盛 惇大 工書畫

盛綱常州人乾隆十年進士官山西絳州知州工文善書畫子惇崇惇大俱有名極一時風雅之盛惇崇字孟岩乾隆四十六年進士在軍機二十年勤敏稱職累遷陝西布政使書畫似其父併有進御輒蒙嘉賞惇大字甫山乾隆四十五年召試舉人授御史出守甘肅慶陽有清節兼工書畫

劉墉 工書

劉墉字崇如號石庵山東諸城人東閣大學士文正公統勳子乾

隆十六年進士官至體仁閣大學士諡文清以書法重於時渾厚雄勁得鍾太傅顏魯公神髓所學貫穿經史百家詩道鍊清雄題跋尤古雅其不以詩文名者爲書名所掩耳嘗語英煦齋尙書曰子他日爲余作傳當云以貴公子爲名翰林書名滿天下而自問則小就不可大成不能年八十五不知所終時公年纔七秩餘迨嘉慶甲子八十有五歲矣臘月二十三日呼煦齋至告以雍正至乾隆初南齋舊事復理前作縱談良久曰吾去矣毋戀越一日晨與飲啖如常端坐而逝

翁方綱工書

翁方綱字正三號覃溪直隸大興人年十二補府學生十五登鄉

薦二十成進士選庶吉士是爲乾隆十七年壬申尋授編修官至鴻臚寺卿屢主文衡所拔皆知名之士預千叟宴重赴鹿鳴瓊林恩宴卒年八十有六先生精心汲古宏覽多聞於金石譜錄書畫詞章之學皆能抉摘精審著有兩漢金石記詩宗韓杜蘇黃書畫法平原繼學率更隸仿史晨韓勅諸碑嘗鉤摹舊帖數十本海內求書碑版者畢歸之世稱翁劉梁王爲本朝四大書家

梁詩正梁同書工書

梁同書字山舟浙江錢塘人相國文莊公詩正長子文莊文章近南豐詩骨蒼秀書學柳誠懸繼參文趙晚師顏李凡三變先生承家學幼卽工書乾隆十七年由舉人特賜一體殿試選庶吉士累

遷侍講以文章書法名世引疾歸江浙之求書碑版及以書法就正者戶履恆滿嘉慶十二年重赴鹿鳴宴年九十三卒

王文治 工書

王文治字禹卿號夢樓丹徒人自少以文章書法稱天下全侍講魁周編修焯嘗奉使琉球邀與俱往琉球人傳寶其翰墨既歸於乾隆二十五年成進士以一甲第三人授編修擢侍讀旋出爲臨安知府以屬吏事鐫級去任後當復職而先生厭吏事遂不復就官高宗南巡幸錢塘僧寺見先生所書碑大賞愛之內廷臣有告之招使出者不應自滇歸買僮教之度曲行無遠近必以歌伶一部自隨辨論音律朝暮不倦海內求書者咸有餽遺率費於聲伎

人或諫之不聽然至客去樂散默然禪定徹夜坐持佛戒日食蔬果如是者數十年其詩與書能盡古今之變而自成其體嘗自言吾之詩與字皆禪理也至嘉慶七年四月跌坐於室中逝矣妻女子孫來相訣者不爲動容及問身後事不答

王玖 工畫

王玖字次峯號二癡常熟人石谷曾孫山水遠承家學而稍變之饒有別趣少嘗遊黃尊古門親授秘法後徧臨古跡藝益精入都頗有聲譽王公大人爭欲藉畫爲其進身階二癡不屑也

華岳 工書畫

華岳字秋岳號新羅山人福建閩縣人僑居杭州書法六朝善人

物山水花鳥草蟲皆能力追古法脫去時習不求妍媚而機趣天然其寫動物尤佳山水未免過於求脫反有失處能詩亦古質擅三絕之勝客維揚最久晚年歸西湖卒於家年望八矣

鄭燮工書畫

鄭燮字克柔號板橋興化人爲人疏宕灑脫乾隆元年進士官知縣有惠政以歲饑爲民請賑忤大吏罷歸書法以隸楷行三體相參有別致古秀獨絕詩近香山放翁有鄭處三絕之目詞勝於詩弔古據懷激昂慷慨與集中家書數篇皆不可磨滅工畫蘭竹以草書之中豎長撇法運之多不亂少不疏脫盡時習秀勁絕倫

金農工書畫

金農字壽門一字冬心浙江錢塘人乾隆元年以布衣舉鴻博不就嗜竒好古收金石文千卷精鑒賞能別古書畫真贋好遊足跡半天下詩格高簡有奇氣分隸獨絕一時年五十餘始從事於畫涉筆卽古脫盡畫家之習良由所見古蹟多也寫竹畫梅畫馬均佳其布置花木奇柯異葉非復塵世間所覩著有冬心集

王一峯莊有恭工書

王一峯字圖南號仁山無錫人諸生事親孝親歿葬靖海門外每日必展謁寒暑風雨無間工書法小楷尤精年九十六卒莊有恭字容可號滋圃廣東番禺人生而穎異乾隆四年舉鴻詞科授修撰官至江蘇巡撫工書法出入顏趙間

葉超 工書

葉超字志高宜興諸生書學米元章兼得褚河南筆意嘗謂武進
惲高士壽平云學米先須從褚入是從源以溯流吾今先學米而
後學褚欲因流以窮源其趨一也著有莪廬詩草

姚仔秦 銑周復 工畫

姚仔字笠山無錫人工山水人物有名於時鄒小山宗伯嘗以其
所摹巖泓曾畫佛數幅進呈同邑有秦銑字南珍諸生善繪事山
水學文待詔花卉尤勝工於臨摹時小山宗伯在籍人欲求其畫
頗難如願南珍輒代作之觀者莫辨真贋焉年八十餘卒又有周
復字文生山水竹石筆墨森秀頗有思致人物設色秀麗

錢維城 工書畫

錢維城字幼安號稼軒武進人乾隆十年以一甲第一名授修撰
累官刑部左侍郎謚文敏書法蘇文忠畫得元人筆意山水邱壑
幽深氣韻沉厚迥不猶人其座右香樹司寇嘗云稼軒自幼出筆
蒼潤秀骨天成通籍後又得力於東山也著有茶山集

龔賢 工畫

龔賢字半千崑山人流寓金陵結廬於清涼山下葺半畝園栽花
種竹悠然自得性孤癖與人落落難合詩文不肯苟作嘔心抉髓
而後成工畫筆意淡逸所著畫訣言近旨遠精確不磨

曹元俊 工書畫

乾隆時吾邑有庚午舉人考授中書曹元俊字偉君號柳溪者喜作詩少年英氣咄咄逼人書初學文待詔既而學顏曰吾今而知宛轉廻向沈着頓挫也兼工畫師心獨運有宋元人意

錢載工書畫

錢載字坤一號穉石又號瓠尊浙江秀水人乾隆十七年進士累官禮部左侍郎學殖淵懋品行修潔詩精於韓杜蘇黃脫去畦町自成一家工書畫其畫得力於南樓老人而間出新意尤工蘭竹

史賡南張鼎錫王嘯工畫

史賡南張鼎錫王嘯俱吳江之善畫者賡南字照音工畫得黃公望法鼎錫字文徵工畫蘆雁雁不過寸許皆有飛舞之勢作大幅

則千百成羣無一複者嘯字補雲善畫一木一石人咸珍之

魏之璜工書畫

魏之璜字考叔上元人性孝友闔宅三百餘指皆仰給硯田未嘗析爨詩清迴絕俗行書撫聖教序楷倣率更淡墨花卉清逸雅秀頗有天然之致山水疏潤尙少渾淪氣象

秦彬王宏撰李英李萼工書

秦彬字中皇吳江貢生善章草得長史素師遺意縱橫天矯頗極自然時有王宏撰字無異號山史陝西華陰人好易精圖象學者宗之工書法凡碑版誌銘或撰或書爲世所推又有李英字御左武進人一作荆溪人由進士授檢討善書筆法厚勁弟萼字秋脰

歲貢生能詩工書

魏之克沈瑤池 工畫

魏之克字和叔上元人之璜弟工詩善山水花卉寫水仙妙極今古時有沈瑤池字古松福建詔安人善畫人物翎毛畫鷹尤工乾隆時徵召不就卒年七十餘

趙左吳宏程邃 工畫

趙左字文度華亭人畫出宋旭之門吳宏字遠度江西金溪人山水縱橫森秀能萃諸家之長而運以己意不肯寄人籬落蓋自關一徑者程邃字穆倩號垢道人安徽歙縣人博學工詩文精篆刻收藏金石最富山水純用枯筆模糊翳鬱別具神味畫中逸品也

繆頌戴炳周尙文汪葑 工畫

繆頌字癡頌號石林散人吳縣人曰藻曾孫王玖弟子工詩畫山水頗得離披之妙同邑有戴炳周尙文汪葑俱善畫炳字明章號笠人工人物山水花卉筆意韶秀尙文字素堅號石湖順昌五世孫山水法大癡翠華臨幸江南與繪江南名勝圖深蒙睿賞葑字芥亭號玉書工山水上溯宋元諸家蒼勁有力

趙秉冲史震林顧鶴慶 工書畫

趙秉冲字謙士上海人欽賜舉人官戶部侍郎以諸生入懋勤殿侍直工真草篆隸梅蘭竹菊屢邀宸賞特有金壇人史震林字岵岡號悟岡一號匏岡居士乾隆丁巳進士官教諭工隸書兼樹石

竹蘭性悅禪詩文近仙佛著西清散記華陽散稿丹徒人顧鶴慶字子餘號弢庵山水宗宋元尤長枯竹瘦石擅行草詩文

李榆戴禮陳率祖 工畫

李榆戴禮陳率祖俱乾隆時之能畫者榆字志良號笏溪婁縣人
工寫照兼長花卉禮字說周號石屏興化人陳撰弟子私淑李鱣
頗有畫名率祖字怡庭號摩崖山人湖南祁陽人官江蘇金山知
縣山水煙雨迷離奇情勃發兼工花卉

項悰戴遠王惟馨 工畫

項悰字吧雲安徽歙縣人工山水在思白長蘅之間同邑戴遠王
惟馨亦精六法遠字士宏號毅齋工人物花木筆意工麗惟馨字

荃心性聰敏工山水摹仿各家均能肖似

周於禮徐良秦瀛 工書

周於禮字立崖號亦園雲南嶧峨人乾隆辛未翰林官大理寺少
卿書法襄陽筆勢雄偉著敦彝堂集有徐良字鄰哉號間存者華
亭人乾隆壬申舉人官四川夔州知府書法思翁時吾邑秦瀛字
凌滄一字小峴號遂庵乾隆甲午舉人官刑部侍郎少負異稟操
筆千言以詩古文名當世工行楷有思翁意兼善隸書著小峴山
人詩文集政餘偶存遂菴日知錄

朱方靄李敬思邢泰陳嵩 工畫

朱方靄李敬思邢泰陳嵩俱有畫名方靄字吉人號春橋昭文人

曾進花卉冊於南巡行在山水亦文質相宜晚歲寫梅閒冷幽雋
頗得荒寒氣味敬思字級齋吳江人官廣東新會巡檢工山水供
奉內廷筆意渾厚近山樵法泰字遇清號香光太倉人貢生精繪
事師王昱花卉宗白陽嵩字肖生如臯人花卉摹北宋尤工寫梅

秦大士陶之金黃掌繪 工書畫

秦大士字魯一號淵泉又號秋田上元人乾隆壬申狀元官侍讀
學士書兼歐柳工畫花卉時有陶之金字載嶽號東圃浙江嘉善
人工書深得魯公坡公法梁山舟學士稱其書直接張照兼工花
竹又有黃掌繪字展之號吟川直隸大興人世有隱德酷嗜金石
詩學樊川書法懷素畫宗關仝筆極清刻著吟川詩鈔

華冠王玉海 工畫

華冠初名點字吉厓無錫人善繪出於天性童時就塾客有訪其
師者冠以寸紙寫其形鬚眉畢肖比長藝益精兼善山水花卉晚
年所作尤幽秀絕倫人推逸品高宗南巡蒸寫御容賞資優渥嘉
慶初徵入都供繪事與修永樂大典議敘官廣東任佛山黃岡同
知以親老乞休家居蒔花疊石以自娛年八十餘卒其友王玉海
由四庫館議敘任蘄水縣丞亦工畫

梁國治 工書

梁國治字階平號瑤峯一號豐山浙江會稽人乾隆十三年以一
甲一名及第授修撰官至東閣大學士謚文定性孝友好學愛才

所至名士如歸居官清儉不名一錢俸入輒隨手盡三黨皆德之
詩文典贍書法得唐人風致

勞澂樊圻葉榮 工畫

勞澂樊圻葉榮俱工畫澂字在茲吳人好遊足跡幾徧天下身所
經歷卽以詩與畫寄意晚年入洞庭西山終老善山水蒼老樸古
功力深圻字會公江甯人工山水花卉人物筆墨工細穆然恬
靜深得宋元遺意榮字澹生號樗叟安徽祁門人早年峰巒石骨
頗得匡廬體貌晚年漸造平淡惜墨如金更饒逸趣

貢震季麟 工書

貢震字息甫江陰人少貧篤志於學文行爲鄉人所推能文善書
著述甚富乾隆辛酉拔貢丁卯副貢歷任安徽知縣知州所至有
惠政同里季麟字晴郊少日卽工詩文楷法乾隆甲寅舉人令鉅
鹿爲政務損己而厚於民

馬豫 工畫

馬豫字觀我陝西綏德人家於金陵丙戌進士授編修累遷侍讀
學士工詩文尤善墨竹脫去時習枯竿新筍各有風趣坡石水澗
亦佳間作白衣大士文昌像清寂而莊督學浙江時屬員士子慕
墨妙者無不饜其意

施心傳 工畫

施心傳字結如福建甯化人好學工文詞善山水得雲林筆法頗

自矜重不妄與人作若富貴人往求尤嚴謝之當蒼松白雪清風皓月之時飲以佳茗出素紙置案上不自覺其性發吮筆點染疊疊不倦

白雲上工書

白雲上字秋齋河南河內人乾隆十六年武進士由待衛累遷副將性警敏工詩善草書在官緝捕救災愛民安國美政不可殫述嘗曰官樂則民苦官苦則民樂以吾一人之苦易數十萬人之樂吾獨不樂乎引疾去官僑寓揚州卒後揚民請入名宦祠既得旨男婦爭進香楮迎主者至萬餘人爲傳誌歌頌者不下數百首

黃經工書畫

黃經字濟叔號山松如阜人工詩詞善書法尤精繪事蒼古淡遠深得大癡神髓其氣清其神厚沈著中饒超塵拔俗之致耕煙外史有云氣愈清則愈厚濟叔真得此中三昧也

顧光旭工書

顧光旭字華陽號響泉金匱人乾隆十七年進士官至四川按察使學術純正居官有清操多惠政致仕歸主講東林十餘年士林仰如山斗工詩尤精書法深入右軍平原堂奧卒年六十七

錢杜工書畫

錢杜初名榆字松壺號叔美浙江錢塘人詩宗岑韋字法褚虞畫從文五峯入手墨梅秀雅靜逸不染塵氛一種書卷之味油然

筆墨外所著畫訣一卷真深得此中三昧者

汪之瑞 工書畫

汪之瑞字無瑞安徽休寧人氣宇軒昂豪邁自喜書法宗李北海善山水以懸肘中鋒運渴筆焦墨多麻皮荷葉等皴愛作背面山酒酣興發落筆如風雨驟至終日可得數十幅興盡僵卧或屢日不起非其人望望然去之雖多金不屑也

王日杏 工書畫

王日杏字丹宸號漱田無錫人王殿撰海文先生之孫幼英敏十歲學為文學書小楷已能規仿晉人比長書畫俱精名噪一時乾隆十八年舉人由內閣中書軍機處行走歷戶部郎中出知銅仁

府攝道篆罷職仍授中書隨大學士溫福赴雲南會有金川之役

以功擢刑部主事三十八年六月兵潰木果木殉焉贈光祿寺少

卿入昭忠祠

任翔張制王申來 工書

任翔字紫廷宜興人乾隆七年進士官至員外郎少勤讀肆力於經史百家書法蘇黃曰必臨池數百字同堅有張制乾隆三十五年舉人工詩文尤工篆書又有王申來字欽文乾隆戊申舉人書法冠絕一時

笄飛石徐誌義 工畫

笄飛石字恒山宜興人鴻序子工畫晚歲名益重後生爭效其所

爲飛石謂曰宜效法古人若惟吾是師徒費筆墨耳識者深然其
言同里徐謙誌義字允宜工畫不輕爲人落墨購得者多珍重焉

吳作樟工書

吳作樟字文潔徐州蕭縣人詩學陶韋尤工書與興化鄭燮善嘗
醉後書擘窠大字變甚欽服之又嘗於金陵佛寺書大雄寶殿四
字字徑數尺觀者悚然仍能懸肘作楷

鄒典鄒詰工書

鄒典字滿字吳八客遊金陵遂家焉喜子身凌晨出郭外登雨花
臺高歌竟日逮暮而返工花卉精逸雅秀有超然塵外之致用墨
一筆間能分淡濃山水亦工子詰字方魯畫宗其父山水工穩而

饒古氣花卉有王若水風格

顧彬工書

顧彬字南華號訥齋無錫人乾隆二十二年進士爲人靜穆有度
終身無疾言遽色工書殿試時纔書數行諸翰林觀者如堵謂第
一人無疑以筆誤置三甲遂淡然不仕

儲家亨工書

儲家亨字賡獻荆溪人能文章尤精隸法胡學使高望見之屬其
從子錫騏以白金求書家亨笑曰吾以筆墨自娛乃貨取耶書而
還其金學使嘉之贈額曰廉潔可風

張宗蒼張洽工畫

張宗蒼字默存一字墨岑號篁村吳縣人高宗南巡以畫冊進卽命入都侍內廷授戶部主事工山水出黃尊古之門筆意沈著神氣葱蔚族子洽字月川晚年契心禪院結廬山中不入城市山水筆意秀逸姿致翩翩山石純用折帶皴無一毫時史習氣

鄧石如 工書

鄧石如其名以恭避仁宗廟諱遂以字行更字頑伯又號完白山人安徽懷甯人少讀書好刻石客江甯梅氏八年縱觀二千餘年金石善本窮日夜忘寒暑以臨摹學成名重公卿曹文敏公稱其四體書皆爲國朝第一涇縣包世臣慎伯推其篆書爲神品嘉慶十年卒年六十有三

朱山 工畫

朱山字懷仁號壽巖浙江歸安人乾隆十六年進士歷官知縣知州頗多惠政工詩古文善水墨牡丹用墨則雋英英奪目兼工山水及古松亦雅韻

諸昇高岑高阜 工畫

諸昇字日如號曦菴浙江杭州人墨竹蘭石師魯得之布葉勻稱發竿勁挺雪竹尤佳同里高岑字蔚生家於金陵幼時學朱翰之畫晚乃以己意行之水墨花卉清逸雅秀有超然出塵之致兄阜字康生畫水仙爲魏考叔所歎賞兄弟怡怡奉孀母備極色養

沈樹玉 工書畫

沈樹玉字蓮夫浙江杭州人精篆籀兼善畫山水寫生筆墨淡逸極其靈秀無一點煙火氣特有畢涵字焦麓武進人書法清勁脫俗山水遠宗古法高出流輩

孫永清工書

孫永清字宏度一字春臺號絜齋金匱人乾隆三十三年舉人授內閣中書尋入直軍機處官至廣西巡撫性警敏諳曉時事精楷法工而捷人人以爲不及也喜吟咏黔粵間民情風土一出於詩著有于役集

焦秉貞工畫

焦秉貞山東濟甯人欽天監五官正工人物其位置之自近而遠

由大及小純用西洋畫法侍內廷所畫耕織圖四十六幅摹村落風景田家作苦曲盡其致深契聖衷錫賚甚厚工筆花卉亦妙

錢維喬陳舒工畫

錢維喬字竹初號樹參武進人維城胞弟乾隆二十七年舉人爲鄞縣知縣歸田後得唐荆川舊園之半葺而居之蒔花種竹享幽棲之樂工詩文善山水邱壑幽靜樹石秀潤無一毫煙火氣特有陳舒字原舒號道山原籍浙江嘉善移居金陵構小園於雨花臺下吟詩作畫怡然自得花鳥草蟲得青藤白陽遺意山水小品亦疎秀閒冷饒韻致惟生平好畫熟紙故不甚爲人所珍

高翔工書畫

高翔字西唐號鳳岡甘泉人能詩精八分工繆篆晚年右手廢以左手書字奇古爲世珍重兼善墨梅花萼筆意鬆秀枝幹蒼潤頗得冬心翁意山水師漸江意趣簡淡又參以石濤之縱恣故筆墨超逸洗盡塵蹊

冷枚戴大有 工畫

冷枚字吉臣山東膠州人焦秉貞弟子人物士女工麗妍雅頗得師傳以畫供奉內廷最久時有戴大有字書年浙江仁和人善人物花鳥士女極豐肥妍雅之態花卉雅淡蘭竹尤佳

王灝 工書畫

王灝字春明無錫拔貢生官廬江訓導前後二十餘年一盤首菴

時以翰墨娛情工詩書法出入唐宋喜畫蘆雁而尤長墨竹筆意勁逸布葉濃淡均有生氣掃盡停勻平實之病嘗於重九日宴集蓉湖第一樓作詩畫會遠近至者五十餘人著有畫竹軒詩稿畫

張棟張肩沈岷懋顧卓 工畫

張棟字鴻勳一字看雲號玉川吳江人諸生家於鶯脰湖之濱博學工詩文畫筆私淑麓臺專用乾筆不喜設色乾隆十六年兩浙雅中丞聘纂南巡盛典同里以畫名者有張肩沈岷懋顧卓肩善墨竹堅勁森密岷懋字樹奇善松竹好作大幅卓字爾立花草得白陽法遊京師宗室紅蘭主人賞之引置賓榻

陳明善劉錫嘏 工書畫

陳明善字服旃武進人官山西朔州知州工詩尤善書兼工竹石
時有劉錫嘏字溇齋直隸通州人乾隆三十四年進士入詞垣官
至江南淮徐道精書法兼工墨梅

邊壽民 工書畫

邊壽民字頤公號葦間居士淮安人諸生工詩詞精書法善潑墨
蘆雁剏前古所未有筆意蒼渾飛鳴遊泳之趣一一融會毫端極
樸古奇逸之致翎毛花卉亦佳江淮間頗有聲譽所居葦間書屋
名流咸造訪之不與塵事日親楮墨蓋淮上高士也其論畫云畫
不可拾前人而要得前人意誠哉是言

童鈺 工書畫

童鈺字二樹號璞巖浙江山陰布衣性豪邁少棄舉子業肆力於
詩尤精古隸山水蘭竹木石均有工力所畫墨梅最夥不下萬本
蒼老樸古墨氣雄厚得之者珍如拱璧

袁樹 工畫

袁樹字香亭浙江錢塘人簡齋太史從弟乾隆二十八年進士官
廣東肇慶府知府工詩文自假歸後鍵戶謝客以筆墨撰述自娛
山水筆意秀潤簡靜渾脫頗得江陰沈凡民之傳

秦儀秦寶 工畫

秦儀字梧園無錫人工山水摹倣石谷尤善寫楊柳籠雨拖煙別
有意趣時人稱曰秦楊柳乾隆乙卯遊武林遽以病歿於吳山道

院子寶字漫郎亦工畫楊柳

高樹程余集 工書畫

高樹程字邁菴號斬玉又號煙蘿子浙江杭州人乾隆丁酉副貢
工詩文書法董趙善山水得華亭遺意寫意花卉頗似新羅人品
絕高故畫多古趣同邑余集字秋室號蓉裳乾隆三十一年進士
詩神韻閒遠書法古秀兼長蘭竹花鳥尤工士女有三絕之譽

潘奕雋 工書畫

潘奕雋字榕臯號水雲漫士吳縣人乾隆三十四年進士官員外
郎重與鹿鳴瓊林宴喜吟咏書宗顏柳篆隸入晉漢人之室工畫
梅蘭水仙信手揮灑頗有生趣年逾九旬猶精神矍鑠詩文書畫

外別無他嗜

吳楸吳霽 工畫

吳楸字逸泉號朝英無錫人工畫人物花草樹石皆精妙亦一時
能手名重公卿間性情高簡不事干謁筆墨如其人無俗韻時有
吳霽字竹堂號倬雲浙江錢塘人乾隆二十八年進士工詩古文
嘗主湖北書院又主吳中平江講席善山水蘭竹間作寫意士女
亦極雋冷

葉有年吳賓陳卓 工畫

葉有年字君山華亭人徧遊宇內畫境得名山大川之助遂成作
手所畫山水頗覺清疏韶秀同里吳賓字魯公善花鳥又工人物

學小李將軍山水則專學董文敏時有陳卓字中立者北京人家於金陵山水工細千邱萬壑得宋人精密之致花草人物亦擅長

王鳳儀 工畫

王鳳儀字審淵太倉人麓臺司農曾孫乾隆十二年舉人官至西安鹽道山水克承家學隨意揮灑另有逸趣邱壑簡淨蹊徑幽秀神韻油然而生於筆情墨趣之外真文人本色脫盡作家面目

嵇承謙 工書

嵇承謙字受之號晴軒無錫人相國文恭公子乾隆二十六年進士授編修官至翰林院侍講弟承豫字介子號笠軒官兵部郎中並以書名同里袁泓字上簡一字讓肩號雲書工篆書子宮桂字

阮山諸生亦工篆書尤究心兵事

康濤潘恭壽 工畫

康濤字石舟杭州人山水筆墨精潔翎毛花卉點染流麗生動盡致人物顧盼有情尤工白描士女洵一時能手同時有潘恭壽字蓮巢號慎夫丹徒人山水規模文氏花卉取法甌香頗有韻致

周銓周覽馬欣 工畫

周銓字巨衡浙江秀水人工花鳥尤長荷鷺人號周荷弟覽字元覽天資超曠不襲前人藁本每畫必對花寫生曲盡娟妍秀冶之致今所傳南瓜圖荷汀白鷺圖瓶蓮圖霜倒半池蓮圖蘆洲鴻雁圖果品雜花冊皆妙絕一時同時有馬欣字頤公河南杞縣人官

推官善山水花草天資敏妙提筆象物嘗畫紅梅一幀以秃筆作老幹點破脂於梢大氣渾穆有八大山人風骨

丁元公工書畫

丁元公字原躬浙江嘉興布衣性孤潔寡交遊詩有奇氣兼精繆篆尤工畫筆老而秀工而不纖其寫山水奇思迅發筆墨空靈頗有煙雲滅沒之趣其寫人物佛像墨與色融化無痕熠熠有生氣晚年爲僧名淨伊號願菴其胸懷蓋有不可一世者

董誥工書畫

董誥字蔗林浙江富陽人邦達子乾隆二十八年傳臚官至太保文華殿大學士謚文恭立朝垂四十年克盡忠悃知無不言言無

不盡尤難者與和坤同居相位守正不阿卒能仰贊廟謨殲除大

慙工詩古文書宗羲獻善繪事進呈諸畫本兩朝聖人並有題詠

李琪枝工畫

李琪枝字雲連號奇峰浙江嘉興諸生太僕日華孫肇亨子畫承家學傳世者墨梅竹居多山水筆墨簡淡姿態秀逸雖不及乃翁之氣息風韻而毫端柔和恬雅之致亦能另闢門徑

侯光第工畫

侯光第字枕漁無錫人長身鶴立吐屬蘊藉飲不多而得飲趣工畫學黃子久弱冠卽賦百花詩百首吳君斧仙序而行之顧困於小試著有蘭圃詩彙六卷醉紅詞彙二卷文彙二卷

許友眉 工書畫

許友眉字有介福建閩縣人孝廉不仕工書其為詩篇不肯襲前人窠臼書畫俱喜臨摹米襄陽所畫枯木寒鴉圖極蒼涼之態墨竹尤工布葉濃淡姿態橫生

王宸維聘 工書畫

王宸字蓬心號子凝太倉人麓臺曾孫乾隆二十五年舉人官永州知府工詩善山水乾筆皴擦極有韻致竹石亦得古法同時羅聘字兩峯號遯夫揚州人冬心翁高弟工詩善畫有鬼趣圖傳世極為名流稱賞

安徽通志羅聘歙縣人僑居揚州

秦文錦 工書畫

秦文錦字仲簡無錫人諸生事孀母至孝甘旨之奉不以貧缺後出遊粵東積有贏金歸置田二百畝與其兄子及季弟均分之而一無所私能文工書畫

錢澧 工書畫

錢澧字東注號南園雲南昆明人少時游同邑王素懷先生之門素懷之教首嚴立品但有一介之苟輒屏之以為非人公謹守其教嘗曰立品必自慎獨始於人所共知者而猶不檢獨中豈可復問人禽之界混則雖破萬卷適以取罪聖賢耳生平剛正之學實本於此乾隆三十六年成進士由編修改御史直軍機處官至通政司副使詩文蒼鬱勁厚書法逼平原亦善畫馬識者珍之

汪本直周在豐顧尊德陶守謙工書

汪本直字讓庭常州人乾隆三十三年副貢官知州篤學工書同里先數十年有周在豐字文邑者以滎陽縣丞歷署縣事潔已愛民嚴懲胥吏工八分書時有金匱諸生顧尊德字廣周洞陽先生七世孫工書學晉帖卒年七十三同邑陶守謙字自牧諸生美丰姿工書能文惜早卒

盛丹工畫

盛丹字伯含上元人茂開子畫承家學蕭疏淡遠邱壑間自有靜氣迎人頗無俗韻每過友人處見几案潔淨筆墨和適輒取案上紙隨意揮灑不自矜惜

勵守謙陸遵書凌瑚汪體仁工書

勵守謙陸遵書凌瑚汪體仁俱有畫名守謙字自牧號雙清老人直隸靜海人宗萬子乾隆乙丑翰林花鳥得家傳遵書字卽仙一字扶遠號芙苑嘉定人乾隆戊子舉人官廣東會同知縣工山水梅竹曾與張鵬翀抗行畫苑瑚字仲華號香泉如臯人士女花鳥法北宋風致妍雅時以梁同書行楷錢維喬山水瑚之寫生爲三絕體仁字景瑤號石瓠吳縣人乾隆辛卯舉人工山水爲婁東深厚一派著佐觴草

梁巘工書

梁巘字聞山號松齋安徽亳州人乾隆壬午舉人官四川巴東知

縣書宗徐季海晚法董香光與詩正同書國治同時人稱四梁又與同書曰南北梁與孔繼洙稱南梁北孔

凌竹程兆熊汪穀江介 工書畫

凌竹字南樓號此君晚號平安老人常熟人工書畫詩詞時有程兆熊汪穀江介俱精書畫兆熊字夢飛號小迂香南楓泉澹泉壽泉皆別號也儀徵人詩書畫時稱三絕穀字心農號琴田安徽休甯人工書畫精鑑定王文治重其書爲勒帖介原名鑑字石如浙江錢塘人花木書法皆近南田梁同書推重之

謝希曾陸恭陸燿 工書畫

謝希曾字孝基號安山吳縣人諸生工小楷山水精鑑賞以所藏

名蹟摹泐禊蘭堂法帖著易學指南同邑陸恭字孟莊號謹庭乾隆時舉人嗜古精鑑工書善畫陸燿字朗夫號青來乾隆壬申舉人官河南巡撫工書畫著切問齋集朗甫詩編運河備覽

張賜甯 工畫

張賜甯字坤一號桂巖直隸滄州人官河工州同工山水花木與高鳳翰張啟異曲同工堪稱鼎峙山水蒼秀渾厚超然拔俗花卉筆力勁逸設色亦古雅清潔兼善人物墨竹又工詩

毛上京彭良做殷樹柏查禮 工畫

毛上京彭良做殷樹柏查禮均精六法上京字羅照號宿亭鎮洋人乾隆壬辰進士官戶部主事山水私淑司農供奉內廷一時稱

旨臨摹古蹟甚夥筆意奇矯深秀良做字研山號視珊江西南昌人官長蘆鹽運使工山水筆意略近司農樹柏字曼卿號雲樓一號懶雲浙江嘉興人花卉宗項氏天真古雅有風人之旨工詞翰著一多廬詩鈔禮字儉堂一字恂叔號榕巢直隸宛平人官湖南巡撫工山水花木雅逸有法

曾煥范永祺

工書

曾煥字底蕃號賓谷江西南城人乾隆辛丑翰林官貴州巡撫工書意兼率更華亭遒勁可愛尤長古文著賞雨茅屋集有范永祺字鳳韻號莪亭者浙江鄞縣人乾隆丙午舉人工篆隸鐫刻

蔣維勤陸飛舒位

工畫

蔣維勤字敏修號拈華長洲人官廣西同知工山水焦墨極醒著丹青雜誌時有陸飛字起潛號筱飲浙江仁和人乾隆乙酉解元山水花卉均法天池飄逸出羣工詩詞題詠著筱飲集又有舒位字立人號鐵雲直隸大興人乾隆戊申舉人工花卉山水頗有天池奇氣著瓶水齋集

萬上遴常世經吳文徵

工書畫

萬上遴常世經吳文徵俱以書畫名當時上遴字輞岡江西南昌人書法近思翁山水宗迂老寫梅爲童鈺繼起所畫山水石廓峻嶒樹木天矯墨梅亦頗老健世經字九一又字豫九號孤峰逸老直隸通州人書畫宗南宮工詩精醫子孫多紹之文徵字南薌安

徽歙縣人官山東同知以書畫著稱孫星衍歷境繪圖多出其手

張寶姚鍾德陳靖 工書

張寶字仙槎上元人工山水筆意近梅道人作泛槎圖勒石有姚鍾德字春帆者常熟人王宸弟子畫得其傳用筆沉著有陳靖字青立者直隸天津人王宸弟子親承指授善摹子八氣骨渾樸

程元 工書

程元 工書 程元 豸金學蓮陳馥翁樹培熊方受俱有書名元豸字直齋如臯人官浙江批驗大使工行草頗入化境學蓮字子青吳縣人附生書法華亭著三李堂詩集馥字里門號春渠浙江錢塘人工隸書有古秀氣樹培字宜泉直隸大興人方綱子乾隆丁未翰林官刑

部郎中工篆隸尤擅摹鐘鼎文字著宜泉錄方受字介茲號夢菴

廣西永康人乾隆庚戌進士官山東兗沂道書法歐董

王元勳吳履 工書

王元勳字湘洲浙江山陰人工士女得周仲朗法不施脂粉更饒嫵媚時有吳履字竹虛號瓦山野老一號公之宅浙江秀水人工山水花卉篆刻與奚岡黃易稱浙西三妙

王宜 工畫

王宜字嶰谷太倉人麓臺司農曾孫審淵觀察胞弟官江右新建縣知縣畫筆秀逸與喆兄齊名林木鬱蔥姿態蕭散頗有司農早年風韻惟少勁挺超拔之致故不能追步司農也

郭鼎京 工書畫

郭鼎京字去問福建福清人工詩小楷倣歐陽率更山水師黃子久頗有鬆靈蒼潤之趣非於此中三折股者不易幾也尤精花草設色妍雅姿態生動

汪樸 工畫

汪樸字素公安徽休甯人性至孝父目失明樸舌舐三年遂復明至行追古人里黨以孝子稱之能鑒別古尊彝彝鼎金石古文及名人書畫善山水得元人疏散之致

張敬 工書畫

張敬字雪鴻號芷園先世安徽桐城遷居江甯乾隆二十七年舉

人為湖北知縣天資高邁兼三絕之譽為人疏放不羈曠達自喜既罷官挈姬妾徧遊吳越間性嗜酒酒酣輿發揮灑甚捷不自覺其氣之豪縱墨之淋漓也工詩真草篆隸無不造極山水人物花卉禽蟲無一不妙其寫真尤神肖

顧雋 沈友士 工書

顧雋字汾陽無錫人諸生家貧勤學尤工於書嘗教人作字經其指示無不光潤可喜弟子至數十百人同邑沈友士字藝林號春颿貢生多聞疆記善隸工詩有春颿存稿

姜恭壽 工書畫

姜恭壽字靜宰號香巖又號東陽外史如皋人乾隆六年舉人官

國朝書畫家傳 卷一
教諭能詩工篆隸善花草竹木縱逸瀟灑脫去時習山水筆意秀
挺墨法簡淨不染塵氛洵是文人筆墨

吳豫杰姚宋工畫

吳豫杰字次謙安徽繁昌人工墨竹徽州姚羽京名宋者山水家
能手也尤長畫石一日蕪湖富室某具盛饌邀兩人合作竹石屏
障吳素簡傲漫視姚姚銜之作石多用反側之勢使難措筆吳持
杯談笑弗顧酒酣提筆蘸墨橫飛風馳雨驟頃刻竹成悉與石勢
稱而枝葉橫斜轉輾愈見竒致姚顧視愕眙咋舌嘆服自後每向
人稱次謙畫竹爲今時第一手

汪文柏李巒工畫

汪文柏字季青號柯庭安徽休甯人官司城頗著循聲然性好習
靜三載卽致政歸里工詩善畫山水蕭疏簡淡絕無喧熱態李巒
字亦山號秋池老人湖北安陸人工山水筆意清潤淡墨居多

莊培因工書

莊培因字本淳武進人乾隆十九年一甲一名授修撰官至侍講
學士尙氣誼重然諾詩文敏贍楷法精妙時扈蹕出塞事有急宣
於行帳中不得據案手一摺疾書而工整不異常時人尤以爲難

瞿潛工畫

瞿潛字又陶華亭人工花鳥雅飭幽豔風神韶亮其水墨者望之
亦若五彩冷雋清永有元人易元吉規範國朝工翎毛者推先生

爲最洵妙品也

錢秉義韓雲俊 工畫

錢秉義字翼倫無錫人倜儻豪邁族黨稱其孝居父喪三年不見齒精篆刻工繪事尤長於花鳥同邑韓雲俊字仲湘一字雲卿諸生美丰儀能詩文工繪事爲鄒小山宗伯入室弟子宗伯家居時每代爲設色見者幾莫能辨

俞兆晟朱賓占 工畫

俞兆晟朱賓占均以畫擅名於世兆晟字叔穎號穎園浙江海鹽人官至內閣學士好畫水墨花草兼白陽胥山樵兩家之勝得其筆墨者無不珍之賓占字仲立浙江嘉興人畫工人物嘗畫凌煙

閣功臣圖

鈕貞顧知 工畫

鈕貞字元錫震澤人工琴以丹青自娛筆墨蒼老氣息渾厚特有顧知字爾昭號野漁浙江杭州人工詩善山水筆意縱恣橫逸不拘繩墨借以抒寫其抑鬱牢愁其用筆之鉤斫拂曳如作草書姿致瀟灑氣味亦極清古墨梅竹尤超逸生動

程鳴 工畫

程鳴字友聲號松門安徽歙縣人諸生工詩善山水學於苦瓜和尚又參之以程穆倩乾筆枯墨運以中鋒純以書法成之不加渲染蒼雅可愛設色亦簡潔明淨另饒韻致著名江淮間

李崧 工畫

李崧字靜山其先江陰人祖國綱徙居吾邑東鄉之嘯傲涇崧不樂仕進與其妻隱居高蹈工爲詩而妻吳及繼妻薛並工詩伉儷間自相倡和於榮利泊然詩名日益高其詩簡古澹樸有真味間畫花蘼蘆雁時露天趣

張師范楊煒 工書

張師范字晴湖武進人以辦征金川軍需有功歷官四川知縣知州喜爲詩尤工書同邑有楊煒字槐占者乾隆四十三年進士工詩善書

沈士充楊晉 工畫

沈士充字子居華亭人畫本趙文度爲雲間派用墨流動筆法鬆秀極有韻致有楊晉字子鶴號西亭者常熟人山水摹倣耕煙種種入妙兼工人物花草尤長畫牛年八十尙強健

錢坫 工書

錢坫字獻之嘉定人乾隆甲午副貢官乾州州判少穎敏著述甚富遊京師朱笥河學士延爲上客工小篆不在李陽冰徐鉉下晚年右體偏枯左手作篆尤精絕

羅牧高星紫 工書畫

羅牧字飯牛江西甯都人僑居南昌敦古道重友誼能詩善飲工楷法山水得魏石牀傳授筆意空靈在黃董之間卒年八十餘時

有高星紫字次薇武進人由舉人官甘泉訓導博學多才工隸書兼善畫

吳求吳期遠曹岳工畫

吳求字彥侶安徽休甯人能詩善畫人物學仇英所作幽風圖十飲圖思致雋逸每一稿成舉國倣效假名以冀厚利求怡然不怪也人服其雅度時有吳期遠字子遠丹徒人畫長於臨摹樹石邱壑規模宋元各家筆情韶秀極爲名流稱賞又有曹岳字秋崖號次岳泰興人山水疏秀淹潤邱壑鬆靈深得思翁清超之致

孔廣森工書

孔廣森字眾仲一字撝約號臯軒山東曲阜人乾隆三十六年進

士官檢討性恬淡耽著述裹足不與要人通謁告養歸不復出高屬文工篆隸著有駢體文三卷大戴禮記補註十四卷禮記卮言六卷經學卮言六卷詩聲類十三卷

邵曾復章逸朱宗洵工畫

邵曾復無錫人工花鳥點染娟秀深得甌香館筆法時同邑有章逸字是仙爲人直諒多聞畫筆蒼秀嘗遊京師與華吉厓同爲質郎稱賞又有朱宗洵字眉壽國子生工詩善畫有名於時

張雍敬工畫

張雍敬字珩珮號簡菴浙江秀水布衣善草蟲布置花草本宋人勾染法工細多致精究天文歷律之學著定律玉衡十八卷詩有

環愁草靈鵲軒等集畫筆其餘技也

王概閔貞工畫

王概字安節浙江秀水人家於金陵工詩文山水學龔半千筆墨
沖淡設色明淨人物松石亦有致其先有閔貞字正齋者江西人
人稱閔孝子山水魄力沈雄頗得巨然神趣人物筆墨奇縱有兔
起鶻落之勢衣紋隨意轉折豪邁絕倫

沈顥工書畫

沈顥字剛倩長洲諸生詩歌文詞書法真行篆籀無所不能畫做
石田翁筆意秀挺鉤勒皴擦毫無俗韻遊白門名噪甚惟石田翁
之浩浩落落渾厚沈雄尙未摹得蓋功力不逮也

鄒方鏐鄒容成工書

鄒方鏐字豫章號半谷無錫人乾隆二十七年舉人工詩文善書
曾書崇安寺中大雄寶殿額庚申兵燹遺失有大雅堂初集後集
其族人鄒容成字雲瞻諸生丰神韶秀工書能擘窠大字

上官周工畫

上官周字竹莊號文佐福建人善山水烟嵐瀰漫墨暈可觀人物
工夫老到運墨設色停勻妥貼晚年薄游粵東名頗盛善詩嘗畫
羅浮山一峯題云割得天南風一角請君展卷看羅浮

韓錫祚岳瀾工書

韓錫祚浙江青田人舉人乾隆二十五年爲吾邑分治之金匱令

有才智工詩古文及書陞松江府累遷松太道時有岳瀾字宗瀛常以人性倜儻善文工書

曹掌蔣宏銘 工書

曹掌字紫綸宜興人乾隆壬午舉人官盱眙縣教諭幼穎悟既長肆力於詩古文詞兼工草隸同里有蔣宏銘字思聲國子生工吟詠書法歐顏一時碑碣皆出其手

葉欣姜廷幹程鵠 工畫

葉欣字榮木松江人流寓白門畫善結構能就目前所見一一運之紙上一經其筆雖極無意物亦有如許靈異其筆意工細幽澹能令展玩者洗滌凡塵也同時姜廷幹字綺季浙江山陰人精繪

事山水外兼工寫生轉折靈動無一直筆點葉墨汁淋漓天然濃淡程鵠字昭黃安徽徽州人酷愛筆墨摹宋元諸家靡不肖似山水絕倫人物花鳥皆精妙

王相英 工書

王相英字鶴亭號淙雲無錫國子生性穎敏倜儻不羈工詩詞善書而獨不喜作時藝亦終身不應有司試飢驅南北迄無所成客死於粵之潮州著有雲中草關中草珠江草

薛宣 工畫

薛宣字辰令浙江嘉善人山水摹仿王廉州用筆厚重有氣一時之能品也嘗自誇於人曰我畫可參二王二王謂麓臺石谷也有

請業者輒謂曰我畫甚不易講奈何其自矜重如此

張宏劉度 工畫

張宏劉度俱以畫名宏字鶴澗號君度吳人工山水蒼勁雅秀蕭
疏淡遠不減元人風致度字叔憲浙江錢塘人山水千邱萬壑層
出不窮布置亦極細密惟光潤有餘靈警不足麓臺論畫有云山
水用筆須毛毛則氣古而味厚叔憲畫其病正在光耳

方士庶 工書畫

方士庶字循遠號小獅道人新安籍家於維揚以書法名行楷結
構嚴密純學思翁臨池之暇若木訥內實淹貫真守道之士也畫
法出黃尊古之門所寫山水臨古者多妙合古人神解

葉潢 工書

錫城北鄉之石幢有葉秀才潢字天來晚號息洲者明閑適先生
裔也克承家學砥志勵行工詩文晚年尤長於行草顧屢蹶棘闈
年七十六猶攜筆硯應金陵試不二年微疾終易簪時索筆題詩
而逝蓋其所養深矣著有居山記兩卷石溪草堂詩六卷息洲雜
錄三卷

柳埭任元璋 工書畫

柳埭字公韓號愚谷金陵諸生工詩書法摹李北海所畫林木山
石筆姿鬆秀頗能脫俗邱壑多變換層出不窮時有任元璋字聲
玘宜興人試棘闈屢薦不售考授縣丞工隸篆兼長指墨畫

楊二溥字希之武進人積學工文以歲貢授安徽甯國訓導嚴課

工書

程崇實學士風丕變善書與同邑薛奕白銘唐宇昭齊名有薛白楊唐四家之稱

施霖戴本孝工畫

施霖字雨咸上元人山水師法元人一種幽閒靜逸之氣可稱逸品時有戴本孝字務旃號鷹阿山樵安徽休甯人在京師夜與友人談華山之勝晨起卽登程往游其高曠如此工詩善畫山水擅長枯筆饒有韻致深得元人氣味

蔣太元呂莛蔣煜工畫

蔣太元無錫人畫青綠山水學李昭道法時同里有呂莛蔣煜俱善畫莛字芳生工畫山水參五峯石門之間秀潤多致煜字鼎堂畫古松大石有石田翁意

賈鉉工畫

賈鉉字玉萬號可齋山西臨汾人工竹石及折枝花喜用瘦筆乾墨風味澹逸若不火食者出守黃州嘗畫竹題識命工人鐫諸石置赤壁人所游歷必經之地其汲汲於名如此

陳嘉言郭鞏陸灝工畫

陳嘉言郭鞏陸灝俱以畫名嘉言字孔彰浙江嘉興人寫花卉翎毛鬆秀可愛鞏字無疆福建莆田人能詩善山水一邱一壑樹石

鈎勒均得古法韻致極清逸翎毛花卉人物亦佳灑字平遠號天
乙山人華亭人摹倣元諸大家各得其趣神氣極完足

鐵保 工書

鐵保字冶亭號梅菴滿洲人乾隆三十七年進士由編修官至兩
江總督以詩名百菊溪謂其詩如王子晉向月吹笙聲在雲外至
其氣韻宏深如河流之發源天上尤工書法北人論書者以劉石
菴相國翁覃溪閣學與先生鼎足而三焉

王樾 王霖顧樹本 工書

王樾字玉溪無錫人諸生爲人沈毅以書法教授鄉里從學者甚
眾年七十餘卒弟霖字雨蒼國子生浙江按察使照磨亦能書喜

襄辦邑中公舉卒年九十有二同邑顧樹本字倫昭諸生喜吟詠
工書隨顧毅夫先生於山東任故其書得毅夫筆法爲多

史嗣彪 孫寅 工書畫

史嗣彪字班如號霽崖金壇人工山水暈潤有氣善楷書一日可
書萬字乾隆丁丑欽取內閣中書卒於官時有孫寅字虎臣號柏
堂浙江錢塘人官穎州知州權鳳陽府僑寓無錫工書善畫

關槐 工畫

關槐字晉軒浙江仁和人乾隆四十五年傳臚仕至閣學工詞章
山水得富陽董相國指授筆思蒼渾鈎勒清勁用墨濃淡得宜頗
饒秀韻駸駸入宋元之室

袁舜裔 工書畫

袁舜裔字石生河南祥符人工書善畫其寫山水墨竹不事摹倣自成家法以孝廉官平原令廉靜愛民有惠政因呈誤去官閉戶不與外事以詩書畫自娛

嚴怪 工書

嚴怪原名載字滄酷四川華陽人為人癡絕人目為怪載聞之喜遂以怪自名工繪事花鳥設想幽僻頗多奇狀山水筆情縱逸脫盡恒蹊嘗畫一古藤蔓延糾結蟠兩山頭一人崎嶇攀援而下凡畫多類此真能極畫家變體另闢町畦也

竇廷棟竇宏楬 工書

竇廷棟字勤宸號湘濬金匱人諸生官山東兗州通判性慷慨有友為福建知縣虧帑被逮因傾資贖之歸書學蘇文忠著有漱石草四卷其從弟宏楬字贊皇號研存余先曾祖也少好學嘗讀書於西神山麓之茅篷圖書一室手不停披無間寒暑旋為設帳計延請者接踵為文簡樸古茂作詩喜寫性靈著有研存賸稿又善書法初學顏柳後臨二王兼工篆隸顧困於小試卒年僅三十九

宋葆淳 工畫

宋葆淳字芝山號帥初山西安邑人乾隆四十八年舉人官解州學正長於金石考據善鑒別工畫山水得北宋人法筆致蒼秀嫻潤意態雄傑墨氣淋漓絕無拘泥瑣屑之狀良由天資高也

松筠 工書

松筠姓瑪拉特氏字湘浦蒙古人乾隆四十一年由筆帖式充軍機章京累官尚書喜為肇窠書尤好作大虎字年八十二薨上諭有歷練老成清勤正直歷事三朝恪恭匪懈等語諡文清

孫銓 工畫

孫銓字鑑堂號少迂崑山人乾隆四十五年舉人由南匯學博遷山東信陽知縣集諸名家法書摹勒入石名壽石齋帖極為時珍重墨竹宗夏仲昭山水宗元四家寫生得白陽筆意亦兼暉法

蔣和 工書畫

蔣和字醉峯號仲叔金壇拙老人孫自稱江南小拙借其兄起元

移家梁溪遂入無錫籍精篆隸行草兼能詩畫隸書蒼古渾厚力追秦漢墨竹花卉得白陽山人遺意少遊京師充四庫館篆隸總校乾隆丙午賜舉人時命刻乃祖所書十三經於石以和董其役補國子監學正引疾歸所著有竹譜行世

張崧尤蔭 工書畫

張崧字寶厓一字寶巖號夕菴丹徒人貢生工篆隸行草兼工畫花卉竹石皆超絕尤擅長山水近師文沈遠法宋元得石田蒼秀渾噩之氣同時有尤蔭字水村號貢父儀徵人山水花鳥皆逸品尤長寫竹得文蘇法蒼古沈厚如挾風雨之勢

張道渥許庭堅 工畫

張道渥字水屋號封紫別號張風子好騎驢又號騎驢公子山西淨山人官兩淮運判後任金川屯田使工詩善山水頗秀潤邱壑畦徑隨筆所至有時繁益加繁有時簡而又簡脫盡窠臼可稱迥不猶人時吾邑有恩貢生許庭堅者字次谷號鄰石家富藏書與弟美曾共事搜討工詩文兼工山水筆意蒼渾沈著墨氣濃厚深得先民矩矱與鮑若洲俞是齋並稱於時性疏懶敦逼不應與到揮灑至廢寢食

孫均工書畫

孫均字古雲浙江杭州人襲祖蔭伯爵收藏甚富漢隸極有古韻精篆刻善花卉隨意點錯瀟灑古雅得青藤白陽神趣後辭爵奉

母日與名流酬唱極林泉之樂

張御乘馮仙滉佟世晉工畫

張御乘馮仙滉佟世晉俱工畫御乘字駕六號適圃浙江烏程人工花鳥筆有異致嘗入都作河清海晏圖公卿有欲薦之者謝去歸老於家仙滉字沁鑑浙江山陰人山水學郭河陽輕淡細秀有雅趣世晉字康侯襄平人善山水多黃大癡高尙書法布置鄭重墨暈淋漓饒有氣概蝦蟹亦佳

馮敏昌工書畫

馮敏昌字伯求號魚山廣東欽州人乾隆四十三年進士官編修改刑部主事工詩尤精書法摹倣大令畫松石蘭竹均蒼雅絕俗

松針鬆秀而饒古韻竹石簡淡中有勁逸之趣

賈季超徐承祖楊點工書

賈季超字雲裝無錫人善畫蘭吳中人甚貴重之稱爲賈蘭花工詩與同里嵇天眉馬雲隄程韻篁諸人相唱和著有護花鈴語時同邑徐承祖號紹宗工墨竹稍後有楊點字文山多讀古畫作翎毛花卉枯槎竹石落筆灑脫摹暉南田幾可亂真

王鳴韶工書

王鳴韶字鶴溪嘉定人諸生工詩畫爲古文以清簡爲工兄鳴盛奇其才責以制舉業曰兄愛我良厚不知我名心素淡也遂閉關絕塵事講學授徒以終著有春秋三傳考十三經異義考

畢沅姚鼐吳錫麒工書

畢沅號秋鵬鎮洋人乾隆庚辰狀元官湖廣總督工書輯河間書畫錄兩浙金石志時有姚鼐字姬傳安徽桐城人乾隆癸未進士官禮部郎中工行楷篆隸擅古文精攷證著惜抱軒集吳錫麒字聖徵號穀人浙江錢塘人乾隆乙未翰林官祭酒工行楷書擅詩賦駢體文著有正味齋全集

侯鳳苞工書

侯鳳苞字舜威金匱人自幼篤學至老不倦從游甚眾乾隆癸卯舉人官寶應教諭課士循循善誘務以實學工書臨王聖教序顏多寶塔工力最深著有洗心齋詩文史論汲古縵等書

易祖栻鮑楷程琳工畫

易祖栻字張有湖南湘鄉人善墨竹不專師法頗有瀟灑出塵之趣同時有鮑楷字端人號棠村浙江嘉興人僑居維揚少工花草師法南田後客沈氏署遂事山水疏朗秀潤得古人意又有程琳字雲來安徽歙縣人徙居浙江嘉興善花草尤工水墨牡丹惟遺蹟不多前大中丞程元章購之甚切僅得三四幅

方薰工書畫

方薰字蘭士號蘭坻浙江石門布衣書法河南詩詞閒淡工細又善古文所著山靜居論畫二卷竟委窮源極有根柢作畫筆意秀挺設色沖淡花草亦娟潔明淨綽有餘妍

馬履泰工書畫

馬履泰字秋藥號叔安浙江杭州人乾隆五十二年進士官太常寺卿工詩文以文章氣節重於時書法宗唐人古健似李北海兼善山水規模大癡蒼楚沈厚頗得元人遺韻下筆生拙掃盡塵蹊真自寫胸臆不肯取悅俗目所以不求工而工處愈不可掩也

王學浩工書畫

王學浩字椒畦號孟養崑山人乾隆五十一年舉人詩文書法均能入古隸書秀挺畫法倪黃魄力極大其氣韻沈鬱筆力蒼勁真深得畫禪精蘊者所著山南論畫數則立論精當趨向最高

孫星衍秦鶴吳乘過鵬飛工書

孫星衍字淵如陽湖人乾隆五十二年探花官山東布政使研究金石碑版工篆隸著金石萃編時有秦鶴字聲九無錫人諸生工書法臨摹歐陽率更書工力甚深其同邑有吳乘過鵬飛俱諸生而以書名者

奚岡 工書畫

奚岡字鐵生號蒙泉外史浙江錢塘人善詩工書又善古隸筆意秀逸高出流輩花卉得南田翁遺意筆法鬆秀最擅勝場蘭竹尤極超妙

胡鋼李點華烜 工畫

胡鋼字百鍊安徽宣城人儒家子也生而十指如鳥爪性穎慧特

異善畫山水秀韻動人詩文亦奇古其填詞數種深得元人聲韻人呼爲鳥爪仙人時吾邑有李點字撰春工寫真筆法高簡神理自足又有華烜亦以寫真著

何道生 工畫

何道生字蘭士山西靈石人乾隆五十二年進士入詞林官知府工詩善山水筆墨清雅文秀之氣撲人眉宇其論畫云與其蒼老而有霸氣何如秀弱而存士氣學者不可不知

高雅壘 工書

高雅壘字殿英無錫人性誠篤博覽羣書孳孳不倦從流寓吾邑之長洲孝廉江筠受經學業益進爲邑名師從遊甚眾工詩文善

書法乾隆五十一年舉於鄉官靈壁教諭

王芑孫 工書

王芑孫字念豐號惕甫嘗欲買田築室於楞伽山又號楞伽山人長洲人乾隆五十三年召試舉人官華亭教諭性簡傲一介不苟取遇公卿若平交或病其狂質狷也其詩癯然以瘦戛然以清書法尤工婦曹氏字墨琴能詩以翰墨聞有十三行臨本行世

陸立 工書

陸立字竹民淮安人福建提學求可裔孫志行絕俗好為詩工八分書與邊壽民維祺周白民振采齊名友善時稱淮上三民蓋壽民初名維祺號壽民後以號為名者也

張問陶 工書畫

張問陶字仲治號船山四川遂寧人相國文端公鵬翮曾孫也乾隆五十五年進士授檢討累官禮部郎中出守萊州府先生狀似猿自號蜀山老猿書法險勁畫近徐青藤詩沈鬱空靈於從前諸名家外又闢一境有青蓮再世之目其婦亦能詩有句云修到人間才子婦不辭清瘦似梅花佳話也著有船山詩草

許憲 工書

許憲字顯明父松佶福建閩縣人為江蘇布政使遂家無錫憲任澄海知縣甫下車即擒積匪誅之田苦斥鹵築長堰蓄淡水溉灌民便之升碣石同知解組歸工書臨摹不輟年九十一卒

陸紹曾 工書

陸紹曾字貫夫吳縣人自鐘鼎古文下及八分行楷靡不研究尤工八分居恆混迹市廛默默若無能及叩以古文奇字古隸偏旁之止譌沿流溯源應之不窮晚年好飛白有飛白錄二卷

桂馥朱紱 工書畫

桂馥字未谷山東曲阜人庚戌進士雲南永平知縣漢隸篆刻雅負盛名詩大半酒後之作生平著作極多尤精金石考據之學為翁覃溪阮芸臺所推重晚年始好寫生另饒古韻意趣在青藤白陽之間錢松壺嘗與討論云畫中惟點苔為難故又自號老苔時有朱紱字九夔武進人工隸書兼善丹青

畢溥 工書

畢溥字逢源號竹濤鎮洋人沉從弟廩貢生書宗兩文敏王文治評其書如簪花美女丰致絕倫時有蔣祥墀字盈堦號丹林湖北天門人乾隆庚戌翰林官吏部尙書書法歐虞

蔡嘉宋光寶 工書

蔡嘉字松原號朱方老民丹陽人山水花木與奚岡齊名有宋光寶字藕塘者長洲人僑寓嶺南工沒骨花鳥又有常熟人郝掄達字蘭坡號鐵蘭道人工山水墨蘭落筆便有奇致著虞山畫志

洪亮吉 工書

洪亮吉原名禮吉字穉存號又蛞陽湖人乾隆庚戌探花授編修

以言事遣戍伊犁釋歸自號更生居士篆法李陽冰兼隸書工詩詞文著附蜻軒菴菴閣更生齋等集輯北江詩話

邵士變唐英 工書畫

邵士變唐英並有書畫名士變字友園號范村又號桑棗園丁安徽蕪湖人諸生嗜古工隸山水師邵瓜疇英字俊公一字雋公號叔子晚號寄蝸老人漢軍鑲黃旗人官內務府郎中工詩書畫

蔣仁姚之麟 工書畫

蔣仁字山堂號吉羅居士浙江仁和人性孤潔工篆隸鐫刻寫山水有幽逸趣同邑姚之麟字虎城號南溪為阮芸臺幕客善鑑金石碑帖工書法畫師陳老蓮

張錦芳 工書畫

張錦芳字粲夫號藥房直隸順德人乾隆五十四年進士官編修初以優貢入都錢竹汀紀曉嵐見之目為奇士性孝友淹貫羣籍通說文分隸得漢人法兼工繪事而於詩所詣尤深著有逃虛閣詩鈔南雪軒文鈔

俞琨 工畫

俞琨字是齋無錫人原名環字企塘詩賦均精妙善山水樹石人物花卉森秀生動頗得元人三昧絕無一毫板滯之跡著有論畫三篇題畫瑣存

錢楷 工書畫

錢楷字裴山浙江嘉興人乾隆五十四年傳臚入詞林歷官廣西湖北安徽巡撫善隸書樸古奇逸深得漢人法工山水簡淡趣足靈秀神腴隨意揮灑頗有廉州麓臺韻致

李寅蕭晨 工畫

李寅字白也揚州人所作桃花楊柳共稱神品兼工山水千邱萬壑層出不窮設色亦娟妍工麗與同里蕭晨齊名晨字靈隱號中素善詩賦兼工繪事山水人物師法唐宋清勁流走畫雪推名手

翟大坤畢瀧朱鶴年 工畫

翟大坤畢瀧朱鶴年俱以丹青名大坤字雲屏號子屋本籍浙江嘉興寄居吳門性情蕭散晚年病耳自號無聞子山水兼綜各家

頗臻妙境寫生得古法瀧字竹癡號澗飛太倉人秋帆沅弟凡遇名蹟不惜重價購藏山水及墨竹蒼潤深秀頗得曹雲西遺意兼工詩鶴年字野雲泰州人僑寓都門山水隨意揮灑不規規古人畦徑人物花卉竹石無一不能

黃鉞 工書畫

黃鉞字左君一字左田安徽當塗人少孤寄居外家乾隆五十五年進士官至禮部尚書謚勤敏工書善畫所進書畫幅久邀宸賞與富陽相國稱董黃二家內府名蹟均經其鑒定晚歲名益重予告後年九十餘目失明自號盲左猶能作書著有西齋集

嵇承咸吳錫桂王鵬運方遂源 工畫

稽承咸字子進無錫人與兄承濬友愛怡怡一室工山水受學於同邑鮑若洲茂才寸縑尺素恆自矜貴索畫客常滿時同里吳錫桂王鵬運皆諸生工山水方遂源亦諸生工蘭竹並有詩名

汪恭陳栻 工書畫

汪恭字竹坪號恭壽安徽休甯人妙音律工行楷書規做夢樓頗得神趣山水心契文氏人物及花卉翎毛俱佳清超脫俗生動盡致時有陳栻字景南吳縣人書法山水俱宗董香光間亦寫佛像仕女有名於時

朱雲燦姜漁 工畫

朱雲燦號尋源湖北江陵人善山水用墨爽邁兼善畫馬以逸筆

灑墨頃刻成十數匹而神駿之姿各具尤工畫魚亦以逸筆灑墨與波光荇藻相動蕩令觀者有濠濮之樂平生好遊凡名山必圖之於泰山作全圖一分圖十六於黃山每景作一圖凡四十八圖著有畫鏡行世時有姜漁字笠人安徽人僑居吳中畫士女極妍雅點綴花卉多丰致樹石蒼潤氣局開張頗有大家遺韻

黎簡 工書畫

黎簡字簡民號二樵直隸順德人乾隆五十四年拔貢爲人高潔清狂日與酒徒醉飲於市自刻圖章曰小子狂簡善詩工書法畫宗宋元極有名譽筆墨簡淡皴擦鬆秀洵是文人逸致

竇廷槐 工書

寶廷槐字公旦號宮三無錫人國子生勤學書力摹智永千字文
右軍聖教序二帖俱臨滿千遍晚年深入晉唐之室當時匾榜大
字舉目皆是滄桑之變僅存古三皇廟四字先賢廉子祠五字而
已卒年七十四

朱繡朱嶼章敏工畫

朱繡字彩章號篔村安徽休甯人山水傳其家學善花草得南田
老人法嘗獨遊黃山挾策踞蓮花峯頂作黃山全圖每入深山見
異花輒貌之故所畫花卉人多不識其先有朱嶼字與山武進人
畫與暉南田齊名南田工著色與山工淡墨畫龍尤爲神品有章
敏字藕溪者常熟人寄居江陰城中小塔巷工繪事名噪一時

顧王霖錢東工畫

顧王霖字容堂號穉圭鎮洋人乾隆五十五年進士入詞垣官員
外郎能詩工畫筆意蒼勁同時有錢東字東臯號袖海又號玉魚
生浙江錢塘人雅善作詩兼長詞曲花卉筆致雋逸設色妍雅得
甌香館之秀媚無一毫時史俗態

阮元工書

阮元字伯元號雲臺一號芸臺儀徵人乾隆五十四年進士授編
脩官至體仁閣大學士加太傅銜生平撰述甚富兼工書尤精篆
隸著有海運考兩浙金石志積古齋鐘鼎款識十三經校勘記皇
清碑版錄學經室集道光二十九年薨年八十有六諡文達

張彪工畫

張彪字汝和號清芬無錫人父宗毅喜畫蘭彪得其傳授與秀水錢坤一少宗伯友善互相切磋畫學益進當時士大夫都珍重求者紛紛乾隆十六年聖駕南巡以所畫墨蘭恭呈御覽恩賚優渥現其子孫及族人藏有蘭花冊頁共二十幀

王國棟王嘉樹王寶檀龔誠邵辰煥工書

王國棟字殿高一字竹樓興化人乾隆六年副榜七歲失怙即知力學長而美丰儀長身鶴立髯垂及腹工詩尤善書客郡城及通州潤州索字者履滿戶外王氏一門多詩人及能書者自其祖貴一後世精翰墨國棟兄嘉樹寶檀並以書名時有龔誠字羽階常

熟人僑寓江陰之北角品高行潔家徒壁立嘯歌自若工詩及書得之醉後者尤佳著有白谷集又有邵辰煥字星城無錫人曾訓孫諸生娶於江陰因僑寓焉工書尤長於詩著有傳硯堂集

伊秉綬工書畫

伊秉綬字組似號墨卿福建甯化人乾隆五十四年進士守惠州多善政再知揚州提倡風雅有功藝苑好蓄古書畫頗究性命之學書似李西涯尤精古隸獨不喜趙文敏其筆墨之高可想見矣偶作山水亦簡淡古秀脫盡恆蹊

汪繩煥杜曙工畫

汪繩煥字祖有一字靜岩安徽徽州人於所居構一靜室繞室鑿

池壘石種竹栽花居然山林幽趣日哦詩作畫於其中頗好客然非素心人不與交工山水得徐白洋法多逸致有杜曙字旭初者河南杞縣人性孤高狷僻善飲醉後染翰不肯休善水墨花草灑落自適有徐天池風兼長山水筆意超逸偶寫白衣大士雅秀可觀名聞梁宋間年八十餘飲啖如少壯

洪範 工書畫

洪範字石農安徽休甯人博雅工詩以諸生佐福郡王幕叙功得官仕至沅沂曹道書法畫筆俱磊落超雋雄視一切山水宗癡翁墨竹師東坡間寫片石疏林小幅則又別饒意趣

杜文原朱會東 工書

杜文原字匯川無錫人貢生性廉潔一介不苟取工小楷屢爲督撫主章奏後在浙撫某署某坐事籍沒先一夕以兩篋遺文原文原堅拒之年八十餘卒有朱會東字星五者武進人以善書名

馮源濟嚴英鍾潒 工畫

馮源濟嚴英鍾潒俱以畫名源濟字胎仙直隸涿州人山水學黃大癡布置宏濶筆墨深厚有名於時英字卧山浙江烏程人山水得小米法尤工松竹爲人性僻終身不娶晚歲倦遊結廬依墓田以老潒字一士山東益都人官觀察山水宗王右丞

那彥成 工書

那彥成姓章佳氏字韶九一字東甫號繹堂滿洲正白旗人乾隆

五十四年進士官至尙書兩任總督性好學能詩工書遇事有執持於權要人無所屈卒諡文毅

程功 工書

程功字又鴻號柯亭安徽休甯人舉孝廉屢困南宮遂不仕善山水有奇氣嘗作白嶽圖卷峰巒林壑寺觀村塢徑路迂迴橋渡往來井井有致能詩著有千竿草堂集

紀復亨吳巖 工書畫

紀復亨字元穉號心齋浙江烏程人乾隆時進士性伉爽而與人樂易工詩著有心齋集善書間畫山水皆超逸有致同邑吳巖字懷峰亦乾隆時進士工繪事自題山水詩多清婉

刑澍 工書

刑澍字雨民號佺山甘肅階州人乾隆庚戌進士官江西南安知府精攷碑版工行楷著全秦藝文志兩漢希姓錄金石文字辨異守雅堂詩文集與孫星衍同輯寰宇訪碑錄

萬承紀 工書

萬承紀字廉山江西南昌人乾隆五十七年副貢官河南同知工詩文簿書之暇輒博綜羣籍雅尚文翰書畫金石悉能鑒別篆刻得漢法與羅兩峯交深悟畫學凡山水人物花鳥蘭竹輿到命筆率能擺脫時習力追古法

侯士毅 工書

侯士穀字懋之一字芒生號覽初無錫人幼聰穎讀書之暇輒喜
握管習字比長益奮力臨摹古帖於孫虔禮書譜尤爲心得嘉慶
初年梁山舟學士遊經無錫邑之以書法就正者有數十人惟先
生與吾族公旦公蒙其嘉許云

沈銓 工畫

沈銓字衡之號南蘋浙江德清人工寫花卉翎毛設色妍麗畫人
物得不傳之秘曾寫花蕊夫人宮辭爲圖殊極巧妙日本國王聞
其名聘往授畫三年辭歸

陳豫鐘 工書畫

陳豫鐘字秋堂號浚儀浙江杭州諸生書法高超勁逸八分亦樸

古尤精篆刻所畫松竹皆以篆法通之姿致倜儻逸趣橫生殊有
典型與奚鐵生陳鼻生齊名時稱浙派嘗集古今畫人爲傳

趙懷玉 石韞玉 工書

趙懷玉字億孫號味辛晚號收庵武進人乾隆庚子召試舉人官
山東兗州同知工詩書法坡公與同里孫淵如洪穉存黃仲則並
稱孫洪黃趙著亦有生齋集時有石韞玉字琢如號琢堂長洲人
乾隆庚戌狀元官山東按察使精攷證工隸書兼擅古文

馬士圖 王謬 馬振 工畫

馬士圖王謬馬振俱以畫名士圖字鞠村上元人工人物山水開
畫社集一時名手著莫愁湖志謬字一士號菊莊青浦人工寫竹

精攷證著今話偶錄振字岡千號雲鶴陝西長安人畢沅幕客縱
臨其所藏工山水花木擅人物法仇唐後館成親王邸第

朱文嶸朱昂之工畫

朱文嶸字峻三一字峻山號酉巖武進人乾隆辛亥舉人官興化
訓導工山水得墨井法子昂之字青立號津里傳其家學所畫山
水輪廓峻嶒頗遵古法

國朝書畫家筆錄卷二終

